



庄跤的竹仔

自有記持以來，庄跤就是有青 **phiàng-phiàng** 的稻田恰烏黹黹(**oo-sim-sim**)的竹仔，譬如講阮古早厝的厝後有茂(**om̄-**)**phā-phā** 的竹圍，厝前有懸大的竹筵，田園隔界有長條(**tng-liâu**)的竹埕，會使講四界攏是竹仔。竹仔佇庄跤生活裡有真親密的關係，親像講厝後的竹圍，共厝宅圍成一個『口』字形，按呢會當隔開內外，會當遮風闌日，佇風水(**hong-suí**)頂面來講，嘛是會當做厝宅的靠山，莫怪人講一個竹圍仔內就有一撮的人家厝(**jîn-ke-tshù**)。

竹筵是幾十枝大竹生做伙，竹管懸拄天，頂面竹葉仔閣濟，就親像一枝天霸王的雨傘。竹筵遮蔭(**ng**)的所在，大人會搬椅條來遮坐涼歇暍，講天說皇帝；囡仔佇遮跳索仔，搨紙牌仔，遮就是庄跤人家的交誼廳、遊樂場。

竹埕是長篙形(**tng-ko-hîng**)的竹林，會當做田園的界線，嘛會當做風圍。收冬的時陣，一大片金黃稻穗的水田，一逝閣一逝烏黹黹的竹埕，一直是我心目中美麗的庄跤光景。現時農村衰微，田園攏放咧拋荒發草，竹埕嘛死甲欲絕種去。游錫堃做宜蘭縣長的時，有獎勵作田人閣再整理竹埕，恢復美麗的風光。效果按怎我毋知，我干焦知影，現時宜蘭的田裡，種的是氣派麗篤(**lè-táu**)的別莊農舍。

十外年前，佇我厝前，有人起一大片的販厝，每暗，個四枝水銀燈共我的門口埕照甲光焯焯(**kng-iānn-iānn**)，予我佇遐坐涼，感覺真鑿目，心內嘛真刺疫，這應該嘛會使算是現代的文明病——光害。佳哉竹仔來鬥相共，我佇隔界的所在種一大片的烏跤綠仔，竹仔勢大，一年就大夠在矣，翻轉年，懸 **lòng-sòng** 的竹林就共光害除掉。這馬，我猶原會當佇埕裡觀星望斗，坐涼開講，這是竹仔上新的用途，嘛閣再證明，伊是庄跤人上好的朋友。

作者：邱文錫

☆詞彙學習☆

【青 **phiàng-phiàng**】**tshenn-phiàng-phiàng**：

青翠碧綠

【烏黹黹】**oo-sim-sim**：黑亮茂盛

【茂 **phā-phā**】**om̄-phā-phā**：濃密茂盛

【竹筵】**tik-phō**：竹櫟

【竹埕】**tik-luàh**：狹長竹林。

【撮】**tshok**：計算少量積聚的物品的量詞。

【天霸王】**thian-pà-ông**：巨無霸

【風圍】**hong-uī**：防風林

【麗篤】**lè-táu**：富麗堂皇

【販厝】**huàn-tshù**：蓋好待售的房屋。

【刺疫】**tshiah-iàh**：不舒服

【烏跤綠仔】**oo-kha-lik-á**：綠竹的一種，竹幹高大。

【大夠在】**tuā kàu-tsāi**：長到完全的高度。

【懸 **lòng-sòng**】**kuân-lòng-sòng**：高不可及。

【觀星望斗】**kuan-tshenn bāng-táu**：觀看星辰。